

中國近代文學叢書

張謇詩集

下

張謇 著

徐乃爲 校點

上海古籍出版社

中國近代文學叢書

張謇詩集

下

張謇 著
徐乃爲 校點

上海古籍出版社

卷七

自民國八年己未訖十年辛酉

元日此君亭追憶徐夫人

翁歸無恙仍元日，人去翛然只此君。乾葉委風鞦韆響，露根裂凍蘚成文。昔年消夏青瑤簟，並坐焚香皂練裙。記得十年淒邑處，祇應蒼翠眼前雲。

〔編年〕

民國七年正月初一日《日記》記作此詩。

海鹽徐君申如兄弟之母八十生朝以戚友所進爲壽者設游民工廠

善事也爲賦一詩

老壽聰強世所譽，學仙度世道之餘。惟坤慈儉能兼齋，似母貞明抱益虛。訓子秉心天在在，芘寒到眼屋渠渠。已知養志非潘岳，吾友賢哉大小徐。

【編年】

民國八年二月三十日《日記》記作此詩。

小狼山

青龍一港流，縱卧沙田間。蜿蜒二十里，泥沙阜流灣。灣令阜小大，大者尊爲山。云何成此阜？畚耜間歲攢。誰歟施畚耜？通人任其艱。借道洩農潦，計畝千工攤。狼山通所祖，阜成亦嶺岼。通人紀辛苦，不忘鄉土觀。嘉名奪俚語，音爲梁所干。梁亦非惡諡，要無義理關。灌莽纏其趾，黍麥籠其顛。樵童與村媪，占利各自前。我昔登陟之，陸海感我天。爾來爲經畫，屏剔培圯殘。列次藝竹樹，要使邱壑完。行當築亭館，供奉大士壇。仰荷悲憫力，洗此娑婆酸。通人長老志，有託庶不刊。新樹方拳拳，新竹方欒欒。

【編年】

民國八年六月二十七日《日記》記作此詩。

胡大德求詩

講學猶療病，惜字等瘞骨。於事非不佳，招搖未云得。昔有王心齋，今見胡大德。大

德心所慕，劉叟以農赫。劉叟叟所能，不能逮士力。習從信佛徒，粗解功過格。乃肯輟耒耜，荷簾走鄉國。所至肩白旂，拍手里兒啼。所至更一旂，積布厚盈尺。其意良未饜，不審目窮的。聊亦憫其愚，要勝膾人跖。心齋輩諸儒，我詩詎足惜！

石壁仙人歌

有序

香爐峰側，石壁有古衣冠人像，長尺許，渲勒分明，距地十餘丈，仰望可見，左右視愈真。意者其化人之遺影歟。歌以記之，補山志，詔來者。

海山不到高官眼，石壁雖光不鏡面。是何怪物著丹青，直攝有形入無間？玄衣方幅縞領巾，鬀冠俄俄裳色縹。排空前下勢逼真，疑是中古神之君。不然遯荒自有服，盍不緼袍而冕玉？方平赫奕大將儀，東海曾來看陵陸。達摩壁影十年功，未及觀棋一子促。神仙狡獪豈有心，傳諸塵俗始自今。上有雲霞晝陰陰，下有松杉蒼翠林。我來學道共冥寂，坐忘不覺溪潮音。

【編年】

民國五年七月二十日《日記》記作此詩。

濟寧李氏重得黃氏所藏唐搨本武梁祠畫像爲賦長句

乾端坤倪聖人揭，庖羲畫卦始工業。斲耜揉耒啓神農，農用匪工器弗給。漢武梁畫有深意，帝溯自羲本諸易。黃帝聰明改作多，堯舜咨禹識地脉。平地成天凡爲民，無民何君君亦蟲。序次十帝有功罪，九勸一懲殿以桀。匹夫匹婦有性情，孝義游俠畫羅列。恢張良貴在天民，出人龍門史遷筆。漢人要是去古近，流露文章著雕刻。後人得之供嗜奇，但考標題辨人物。一點一畫校差訛，遙遙李唐見起訖。勝清大獄文士最，士氣顛夷帝威烈。限制生人政事才，安分窮經逮金石。黃氏好古得此本，遠傲鄱陽嬉翠墨。朱查翁錢阮何張，先輩後輩傾倒一。濟寧李氏有淵源，重得外家珍祕冊。樂觀猶似嘉道間，繪圖索詩高興發。如聞劫火落人間，帝像已先帝運熄。所嗟桀行塞區宇，堯堯舜舜口誦說。雍參豕苓帝有時，獨苦吾民未蘇息。生民豈不賴工農，老我滄江守白日。李君李君抱畫歸去勿復言，紫雲山中有石室。

【編年】

民國七年二月二十六日《日記》記作此詩。

林檎三十二韻

靈運居山後，微之入曲中。林開連浦旭，芳遞過江風。魏郡前聞洽，肩吾謝啓工。根含南國秀，狀體北方崇。索字先徵帖，裁詩遠寄筒。致緣青鳥便，來引翠禽同。粉靨窺匳薄，丹膚映穀豐。木瓜投以衛，蘭佩采諸澧。有味資談笑，無因證色空。趾拊春盡萼，指葉露餘蔥。珍托芝房供，香教蕙帳籠。燈輝珠爍閃，盤抱玉玲瓏。撫撫雞頭軟，悵悵鳳味通。姑峰霞繾繾，巫峽雨濛濛。試爪愁仍破，嚙牙未忍終。洛妃裙脫錦，漢女漏聽銅。還憶之采路，頻迴滄瀆篷。舌根留隱隱，心緒繞忡忡。動感三秋鳩，誰猜五采虹。傾筐憐散騎，求子避王戎。有偶芹俱碧，相思豆亦紅。羞隨櫻並薦，種欲桂成叢。問訊淆鴉鵲，遭時隔燕鴻。輕輿雲出岫，步幃月臨宮。宛轉邀青李，遮防護碧櫻。難禁黃口孺，肯餉白頭翁。綽約將離芍，差池合臭芎。深情纏逸少，永好答桓公。啼臉惟當積，分心不主馮。頗婆馨著枕，的藪苦憐蓬。續斷仙方藥，蹉跎人鬢桐。天孫能爲主，玉井願無窮。

舟中有夾竹桃排律十韻和人

連理誰家瑞木栽，春餘夏始此低徊。相當相對真花葉，奇女奇男孰介媒？墨采風流愁與可，緋衣人影隔天台。字輸萬個還千個，郎問前回接後回。笛好何心伍椽桷，露零滿抱泣瓊瑰。逃虛或悟維摩色，結子應憐鬪穀才。吳下園亭嘗假顧，門前詩句已題崔。欲扶翠袖依香閣，憑染紅箋上玉臺。夢裏瀟湘疑有雨，落時茵簟願爲苔。猗猗灼灼經都貴，分付群蜂莫浪猜。

【編年】

民國九年五月十六日《日記》記作此詩。

【校記】

題中「夾竹桃」原作「夾紅桃」，今據《日記》改。「和人」作「和林風」。

耐園翁以其室人硯香君畫蘭冊屬題

墨華含動別離愁，認取中間四十秋。題畫當年人亦老，老人何況在南樓。

蓀荃繞砌尚英英，莫更凋霜怨早莖。相慰白頭如畫好，嗇翁眼爲兩花明。

【編年】

民國九年四月二十日《日記》記作此詩。

坳池對月

臨水忽知夜，停燈坐近窗。老人安處獨，好月奇還雙。收並雲光入，涵滋露氣降。迢遙銀漢界，延佇木蘭艣。

坳池七尺水，容受一年月。水自有盈虛，月亦任員闕。情合勝女牛，地聚便吳越。不在鬪姝顏，亦自寶華髮。

【編年】

民國九年五月九日《日記》記作此詩。

慕疇堂西柏

一歲一相見，櫛森映我眸。盈庭籠翠暖，近瓦拂蒼溝。寒燠常林共，風煙大墅收。棟

樑期汝舍，端以紀春秋。

【編年】

民國九年五月十八日《日記》記作此詩。

夢中有人命作風雪吟授簡者一女郎督促甚亟成五六七言五章以
應醒後脫佚補綴錄之

白雪不聞歌，迴風舞若何？有人應記得，月姊與星娥。

積雪耐人慣冷，薰風解慍偏柔。合置銀屏珠箔，人間七處瓊樓。

巽二自然妙女，滕六疑亦神妃。東皇笑占偶數，左鸞右鳳驂騑。

舞處風能主雪，凝時雪亦賓風。不我與乎雀燕，是有命也魚熊。

藐姑綽約雪冰姿，婉孌封家十八姨。下界妄生分別見，長旛溫宮護花時。

【編年】

民國九年五月十九日《日記》記作此詩。

易園自江灣寓書知源植林興學慨然有經營村落之舉寄貲爲助

復成此詩

聞說山中業，艱辛吾道南。地良滕不小，天遠衍能談。話耻書生酒，仁方佛典參。儘多商推事，待子意潭潭。

【編年】

民國九年五月二十日《日記》記作此詩。

感事

江南草長看鶯亂，海上濤翻突鶴軍。相彼鳥兮尚求友，涉吾地也不虞君。輔車焉用奇奚識，肝膽空令楚越分。無數雞蟲天未隘，可憐蠻觸日俱曛。

【編年】

民國九年六月六日《日記》記作此詩。

林風以詩寄壽字錦被賦長句答之

昨者贈子雪色絺，報我錦段光陸離。絺薄段重比不得，況爾四角中央壽字織。感子祈年歌吉祥，護我魂夢錦繡香。字多二百九十九，一字一歲籌同長。字亦不多籌不長，十年世事礪礪光。足抵麻姑話滄桑，姑髮過腰鬢不霜，儻能時從方平王。

【編年】

民國九年七月八日《日記》有「林風寄段（緞）被至」，故此詩當作於七月八日或稍後。

中等以上學校聯合運動會歌

秋肅爽兮天沈寥，黃花燦爛城南郊；會場此地兮，重九今朝。七校莘莘千百曹，旂章五色鳶隼飄，左手執槍右秉刀。秋以講武左訓昭，士不可弱兮氣不囂。君不見西風送雁遙，聯翩有序兮天際行高。

師範附屬小學校校歌

城南空氣文明遠，奕奕圖書館，博物堂堂苑。美哉新校中間建，校宇周阿廣且衍。清明朝氣朝朝轉，舊校風光分一半。啓我弁，啓我艸，斯誦斯弦樂無畔。

【編年】

民國八年新校始成，詩中「美哉新校中間建」，即謂此。因可繫焉。

七夕

秋夕無關嫁娶春，星橋不作女牛津。可憐側睇樓西月，祇照人間離別人。
未必神仙歲月多，一年一度會銀河。人間七載田蠶偶，已勝蟠桃熟一過。

【編年】

民國九年七月七日《日記》記作此詩。

雨後見鳳仙漂雪宦庭後池中

忽等桃花付水流，奈無人替此花愁。自開自落清波上，不藉春風不恨秋。

【編年】

民國九年七月二十一日《日記》記作此詩。

欲寢

適罷馳驅轍，旋開窈窕窗。撫床溫夙夢，驚笛咽離腔。欲寢頻看枕，無憀更掩釭。窺檐新月瘦，瘦影却能雙。

【編年】

民國九年八月九日《日記》記作此詩。

國慶紀念日申報徵詩

倣擾神州又八年，一年一度一瞿然。文章未易論聲價，色味終須辨濁羶。衆鑠何緣歸大冶？百狂有力障東川。扶輿正要輿人誦，獲野應資野史編。

【編年】

此爲民國八年的國慶節所寫。

聞故友山西王梧岡之卒

都門門巷逐年非，英古齋留舊日題。今世古人誰省識？山西王叟海王西。
每因問訊知俱健，曠隔原無相見期。若尋說叟傷懷者，海內唯應鄭太夷。

滄江翁今年七十不以生日告人八月一日爲延客觴翁於觀萬流亭

賦詩爲壽屬客與翁和之

六十七翁髮皤，舊運新運天旋螺。春秋惟有亂可紀，指翁作《韓史》。憂樂合以詩相磨。
看花老輩應逾共，載酒佳時莫厭多。檻外朝來雲物好，從容等視萬流過。

東北浮雲屢變更，秋風落日漢陽城。南壇幕府縈吾夢，左列詞曹繫子情。一局爛柯嗤對弈，幾時得盡話長生？引年送日須歌舞，準備纏頭聽玉笙。

【編年】

金滄江誕生於一八五〇年，一九一九年（民國八年）七十虛歲，即此年八月一日作。

西寺種松

種松豈是十年事？閱世稀聞百歲人。夾道定教敷美蔭，再來果否記遺塵？題詩刊石諸天笑，獻佛供花十地春。看取當檐雙杏在，蒼然老輩鬱嶙峋。

【編年】

民國八年正月二十九日《日記》記作此詩。

【校記】

「果否」，《日記》作「能否」。

「刊石」，《日記》作「刻石」。

「當檐」，《日記》作「中庭」。

牯牛石歌

牯牛嶺路群魔巢，牯牛嶺石昆吾刀。凶德四會天爲牢，渠不可宥網莫逃，疑神疑鬼人謹號。匡廬自是仙靈窟，遠公東林有遺跡。入社猶嫌靈運汗，搜山那許孫恩賊。遙遙史事人所知，渺渺天心那可測。懲姦殛佞亦偶然，羅刹壓伏昔人傳，天寧有暇作法官！人所共快歸諸天，洗惡絕勝香爐泉。香爐飛泉白龍挂，泉自無聲石作怪。寄語蜣螂轉糞丸，勿攪

潔淨山林界。

三月三日海上

水見蒲芽岸見芹，櫻桃紅白柳條新。
人間海渴天荒處，亦有詩家上巳春。
百歲輕輕殼脫螺，海田無限去來波。
麻姑不作荒唐語，老子其如白髮何！
蜃氣樓臺孰假真？蓬萊宮闕有金銀。
等閒滿地珠如米，不待仙人待後人。

【編年】

民國八年三月三日《日記》記作此詩。

【校記】

其三之「蓬萊」，《日記》作「望中」。

應季中輓詞

學佛年來季益專，閉門跌坐佛香前。
功名結束浮沈夢，恩怨消除戰鬪天。
若爲憐蛇虺亦僅，終能逃虎豹猶賢。
聰明苦惱今何有？淨土彌空十丈蓮。